

豫章叢書

第九八冊

寓意草卷四

西昌喻 昌嘉言甫著

○○○論顧鳴仲痞塊錮疾根源及治法

顧鳴仲有腹疾近三十年朝寬暮急每一大發腹脹
十餘日方減食濕麪及房勞其應如響腹左隱隱微
高鼓呼吸觸之汨汨有聲以痞塊法治之內攻外貼
究莫能療余爲懸內炤之鑑先與明之後乃治之人
身五積六聚之症心肝脾肺腎之邪結於腹之上下
左右及當臍之中者皆高如覆孟者也膽胃大小腸
膀胱命門之邪各結於其本位不甚形見者也此症

乃腎臟之陰氣聚於膀胱之陽經有似於痞塊耳何以知之腎有兩竅左腎之竅從前通膀胱右腎之竅從後通命門邪結於腹之左畔卽左腎與膀胱爲之主也六腑惟膽無輸瀉其五腑受五臟濁氣傳入不能久留卽爲輸瀉者也今腎邪傳於膀胱膀胱溺其輸瀉之職舊邪未行新邪踵至勢必以漸透入膜原如革囊裹物者狀經曰膀胱者州都之官津液藏焉氣化則能出矣狀則腎氣久聚不出豈非膀胱之失其運化乎夫人一圍之腹大小腸膀胱俱居其中而胞又居膀胱之中惟其不久留輸瀉是以寬乎若有

餘地今腎之氣不自收攝悉輸膀胱膀胱之氣蓄而不瀉有同膽腑之清淨無爲其能理乎宜其脹也有與生俱焉者矣經曰腎病者善脹尻以代踵脊以代頭儻膀胱能司其輸瀉何致若此之極耶又曰巨陽引精者三日太陽膀胱經吸引精氣者其脹止於三日此之爲脹且數十年之久其吸引之權安在哉治法補腎水而致充足則精氣深藏而膀胱之脹自消補膀胱而令氣旺則腎邪不蓄而輸化之機自裕所以然者以腎不補不能藏膀胱不補不能瀉然補腎易而補膀胱則難以本草諸藥多瀉少補也經於膀

肱之予不足者斷以死期後人莫解其故吾試揣之
豈非以膀胱愈不足則愈脹脹極勢必逆傳於腎腎
脹極勢必逆傳於小腸小腸脹極勢必逆傳於脾乃
至通身之氣散漫而無統耶醫者於未傳之先蚤見
而預圖之能事殫矣

胡肖臣先生曰言腹中事如張炬而遊洞天愈
深愈朗

○袁聚東痞塊危症治驗

袁聚東年二十歲生痞塊臥床數月無醫不投日進
化堅削痞之藥漸至毛痺肉脫面黧髮卷殆無生理
買舟載往郡中就醫因慮不能生還而止然尙醫巫
日費余至則家計已罄姑請一診以決生死遠近耳
無他望也余診時先視其塊自少腹至臍傍分爲三
岐皆堅硬如石以手附之痛不可忍其脉止兩尺洪
盛餘俱微細謂曰是病由見塊醫塊不究其源而悞
治也初起時塊必不堅以峻猛之藥攻至真氣內亂
轉護邪氣爲害如人廝打紐結一團旁無解散故逆

解結成塊
說得躍然

與治倪處
雲先用理
中同意

緊不放其實全是空氣聚成非如女子衝任血海之
地其月經凝而不行卽成血塊之比觀兩尺脉洪盛
明明是少陰腎經之氣傳於膀胱膀胱之氣本可傳
於前後二便而出悞以破血之藥兼破其氣其氣遂
不能轉運而結爲石塊以手摩觸則愈痛情狀大露
若是血塊得手則何痛之有此病本一劑可瘳但數
月悞治從上而下無病之地亦先受傷姑用補中藥
一劑以通中下之氣然後用大劑藥內收腎氣外散
膀胱之氣以解其相廝相結約計三劑可痊愈也於
是先以理中湯少加附子五分服一劑塊已減十之

案中每從
受高處定
善後法非
世醫顯用
氣血通套
藥所以爲
良

三再用桂附藥一大劑腹中氣響甚喧頃之三塊一時頭沒戚友共駭爲神再服一劑果然全愈調攝月餘肌肉復生面轉明潤堆雲之髮纔剩數莖而已每遇天氣陰寒必用重絛厚被蓋覆不敢起身余謂病根尙在蓋以腎氣之收藏未固膀胱之氣化未旺兼之少年新婚儻犯房室其塊復作仍爲後日之累更用補腎藥加入桂附而多用河車爲丸取其以胞補胞而助膀胱之化源也服之竟不畏寒腰圍亦大而體加充盛年餘又得子感前恩而思建祠肖像以報以連直歲凶姑尸祝於家庭焉亦厚之道矣

胡尚臣先生曰辨症十分明徹故未用藥先早
知其効効矣又早善其後得心應手之妙一一
傳之紙上大有可觀

○○○○論楊季衡風發之症并答門人四問

季衡翁稟豐軀偉望七之齡神采不衰近得半身不遂之症已二年矣病發左半口往右喎昏厥遺溺初服參朮頗當爲點醫贊以左半屬血不宜補氣之說幾致大壞雲間施笠澤以參附療之稍得向安然概從溫補未盡病情也診得脉體軟滑中時帶勁疾蓋痰與風雜合之證痰爲主風爲標也又熱與寒雜合之症熱爲主寒爲標也平時手冷如冰故痰動易至於厥然厥已復甦甦已嘔去其痰眠食自若雖冬月亦能耐寒無取重裯複絮可知寒爲外顯之假寒而

熱爲內蘊之眞熱既有內蘊之熱自蒸脾濕爲痰久
久阻塞竅隧而衛氣不過外風易入加以房幃不節
精氣內虛與風相召是以雜合而成是症耳及今大
理右半脾胃之氣以運出左半之熱痰虛風此其間
有微細曲折非只溫補一端所能盡者何也治雜合
之病必須用雜合之藥而隨時令以盡無窮之變卽
如冬月嚴寒用事身內之熱爲外寒所束不得從皮
膚外泄勢必深入筋骨爲害矣故用薑附以暫徹外
寒而內熱反得宣洩若時令之熱與內蘊之熱相合
復助以薑附三熱交煽有灼筋腐肉而已孰是用藥

之權衡可以一端盡耶或者曰左半風廢而察脉辨症指爲兼痰兼熱似矣痰者脾濕所生寄居右畔是則先宜中右而何以反中左耶旣已中左明係左半受病而何以反治右耶不知此正病機之最要者但爲丹溪等方書說病在左血多病在右氣多教人如此認症因而起後人之執着至內經則無此說也內經但言左右者陰陽之道路夫左右旣爲陰陽往還之道路何常可偏執哉況左半雖血爲主非氣以統之則不流右半雖氣爲主非血以麗之則易散故肝膽居左其氣常行於右脾胃居右其氣常行於左往

來灌注是以生生不息也肝木主風脾濕爲痰風與痰之中人原不分於左右但翕恃其體之健過損精血是以八天癸已盡之後左半先虧而右半飲食所生之痰與皮毛所入之風以漸積於空虛之府而驟發始覺耳風脉勁疾痰脉軟滑惟勁疾故病則大筋短縮卽舌筋亦短而蹇於言小筋弛長故從左而喎乎右從左喎右卽可知左畔之小筋弛而不張也若左筋之張則左喎矣凡治一偏之病法宜從陰引陽從陽引陰從左引右從右引左盍觀樹木之偏枯者將溉其枯者乎抑溉其未枯者使榮茂而因以條

暢其枯者乎治法以參朮爲君臣以附子乾薑爲佐使寒月可恃無恐以參朮爲君臣以羚羊角柴胡知母石膏爲佐使而春夏秋三時可無熱病之累然宜刺手足四末以泄榮血而通氣恐熱痰虛風久而成癘也

門人問曰經文左右者陰陽之道路註解以運氣之司天在泉而有左間右間爲訓遂令觀者茫然今先生貼以往還二字與太極動而生陽靜而生陰天地生成之數春秋自然之運適相符契矣但不知往於何始還於何終可得聞乎答曰微哉問

也天地之道春氣始於左而終於右秋氣始於右而終於左夏氣始於上而終於下冬氣始於下而終於上人身亦然經云欲知其始先建其母母者五臟相乘之母也又曰五臟以生尅而互乘如右之肺金往左而生腎水尅肝木左之心火往右而生脾土尅肺金之類其往還交織無端然始於金者生則終於土尅則終於火始於火者生則終於木尅則終於水此則交織中之次第也推之十二經如子時注少陽胆丑時注厥陰肝之類亦交織中之次第也誠建其母推其類而始終大略睹矣

難經錯誤
分析其精

又問曰病機之左右上下其往還亦有次第乎答
曰病機往還之次第不過順傳逆傳兩端順傳者
傳其所生乃天地自然之運如春傳夏夏傳長夏
長夏傳秋秋傳冬冬復傳春原不爲病卽病亦輕
可逆傳者傳其所尅病輕者重重者死矣如春傳
長夏長夏傳冬冬傳夏夏傳秋秋傳春非天地自
然之運故爲病也曰經言間傳者生七傳者死則
間傳爲順傳七傳爲逆傳無疑曰非也註難經者
言間傳是順行隔一位而傳悞認病機但從右旋
左不從左旋右皆繇不知左右往還之理而以訛

傳訛試訐以腎水間一位傳心火爲逆傳之賊邪則無可置喙矣故問傳七傳俱於逆傳中分生死耳問傳者心病當逆傳肺乃不傳肺而傳肺所逆傳之肝肺病當逆傳肝乃不傳肝而傳肝所逆傳之脾推之肝病脾病腎病皆然此則臟腑不受尅賊故可生也七傳者前六傳已逆週五臟第七傳重復逆行如心臟初受病二傳於肺則肺臟傷三傳於肝則肝臟傷四傳脾五傳腎六傳仍歸於心至七傳再入于肺則肺已先傷重受賊邪氣絕不支矣所謂一臟不兩傷是以死也不比傷寒傳經